

徐

氏

筆

精

七
之
八

CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY

04

OCT 4 1951

T 9153/2992(4)

卷之七

晉安徐勣勳與公議

同聖德投本筆復訂定

謝陵書居才明立編次

附錄

卷之七

卷之七

卷之七

晉安徐勣勳與公議

徐氏筆精卷之七

哈佛大學
哈佛葉宗
圖書館
珍藏印



晉安徐 焞與公謨輯

同里邵捷春肇復訂定

溫陵黃居中明立編次

文事

載籍

書學

畫

碑版 六十一則

孟子

孟子門人見於書者十七人皆配享他無考

帝王好書

歷代帝王皆好典籍秦火為萬古罪人無論已

筆精

卷七

漢興除挾書律廣開獻書之路景帝募求天下遺書藏之秘府武帝建藏書之策置寫書之官成帝使謁者陳農求天下遺書詔劉向等校定光武入洛書二千餘輛後于東觀廣集新書命班固等讐校明帝大會諸儒于白虎觀攷訂群籍靈帝詔諸儒正定五經刊石魏道武命郡縣大收書籍悉送平城隋文帝遣使四方搜討異本每書一卷賞絹一疋煬帝觀文殿構甲乙丙丁書屋唐貞觀中魏徵虞世南顏師古請購火

下書選五品以上子孫繕寫藏內庫玄宗幸東都議借民間異本傳錄以千錢購書一卷後唐莊宗募民獻書及三百卷者授以官銜明宗令國子監校定九經雕印賣之周世宗銳意求訪凡獻書者悉加優賜宋太宗下詔購募亡書分置書府涉弼等並賜科名太宗構崇文院以藏書籍分經史子集四庫仁宗詔中外士庶上館閣闕書每一卷支絹一疋五百卷與文資官徽宗詔郡縣訪求秘書助教張頤進二百二十餘

卷賜進士出身李東一百六十卷補迪功郎高
宗南渡獻書有賞元世祖遣使取在官書籍版
刻至京師我太祖定鼎之後極重儒臣詔纂
國家切要之書成祖詔脩永樂大典一時
儒臣畢集天下賢才聘辟無筭凡南京文淵閣
所貯古今一切書各取一部送京以後則杳無
求書之令矣國家事事可侔前代獨好文之主
稍遜

藏書

海鹽姚叔祥有言今藏書家知秘惜爲藏不知
傳布爲藏何者秘惜則緗橐中自有不可知之
秦劫傳布則毫楮間自有遞相傳之神理然所
謂不知傳布之說有四大抵先正立言有一時
怒而百世與者則子孫爲門戶計而不敢傳闕
竒炫博樂于我知人不知則寶秘自好而不肯
傳卷軸相假無復補壞刊謬而歛踵還癡一咳
則慮借抄而不樂傳舊刻精整或手書妍妙則
懼翻摹致損而不忍傳凡此四不傳者彼錄不

知世變靡常聚必有散一旦三災橫起流爛滅
沒無論藏者且累著作姓名一併抹煞是藏有
加于亡何必後來信信詈祖龍爲也

又

吾鄉前輩藏書富者馬恭敏公森陳方伯公暹
馬公季子能讀能守陳公後昆寢微則散如雲
烟矣又林方伯公懋和王太史公應鍾亦喜聚
書捐館未幾書盡亾失然四公之書咸有朱黃
批點句讀余間得之不啻拱壁也予友鄧參知

原岳謝方伯肇淞曹觀察學佺皆有書嗜鄧則
裝潢齊整觸手如新謝則銳意蒐羅不施批點
曹則丹鉛滿卷枕藉沈酣三君各自有癖然多
得秘本則三君又不能窺予藩籬也

揚文貞積書

揚文貞公士奇文籍志序云吾先世藏書數萬
卷元季悉燬于兵吾早有志于學而孤貧不能
得書稍長事鈔錄無以爲楮筆之費則往往從
人借讀不能數得年十四五出教童蒙頗有所

入以供養不暇市書也弱冠稍遠出授徒所入頗厚始蓄書不能多也及仕于朝有常祿又時有賜賚節縮百費日月積之一爲收書之資歷十餘年經史子集雖不能備頗有所蓄視吾先世所藏千百之什一視吾少時可謂富矣夫人於其所好勞心苦力以求得之必將謹護珍襲不至于廢壞逮傳其後之人未嘗知得之之難蓋有視之漠然不以留意棄之如棄瓦礫者矣吾懼後之人不知守也凡書其志吾之所以得而勉其所以守蓋昔人愛一草一木猶戒子孫以勿壞矧書籍聖賢至訓之所寓乎敬之哉文貞公勲業名位冠于國初賜賚祿入積爲收書之費足見先輩雅尚

楊文貞母

楊文貞公士奇少孤貧十六歲出爲村落童子師欲買史畧二冊百錢不能得其母夫人畜一牝雞數歲命以易之世有此母安得不生此子

書城

宋李德茂環積墳籍名曰書城予友邵武謝兆
申好書盡罄家貲而買墳籍兀坐一室四面皆
書僅容一身宋世版本未盛恐李公未必如此
之富予與謝君極稱臭味交謝君藏蓄幾盈五
六萬卷又多秘冊合八郡一州未有能勝之者
不歎古人書城書窟書倉書岩爲奇耳

保守書籍

世之蓄田產屋宇多者子孫稍賢必保守不失
何也可以資衣食不匱也蓄尊罍彝鼎多者子

孫稍賢亦保守不失何也可以資耳目近玩也
惟蓄書籍圖畫多者子孫雖賢未必保守不失
何也非深知篤好者鮮不屑越也余見保產業
之家多至六七代而保書籍者不過一二代耳
然保之之法當較之田產屋宇尤加嚴密庶幾
歷四五代也唐末吳人徐脩矩世守書籍萬卷
皮日休常就借讀日休詩云保茲萬卷書守慎
如羈紲陸龜蒙詩云吾聞徐氏子奕世皆才賢
因之遺孫謀不在黃金錢若才賢不至奕世守

慎不如羈縻非所以論保守也

聚書十難

陳貞鉉曰聚書有十難學無淵源一難也家少承書二難也不生通都大邑三難也乏慧鑒四難也隋唐以上書不多見五難也攜帶跋涉易致觸損六難也檢曝之勞病于夏畦七難也近無善本校讐斯苦八難也家貧購書九難也片時不閱便供蛀蟲十難也夫聚必有散物理之常念此十難嗜好彌篤余嘗言曰田宅易購美書難逢緣不相值竒秘終蘊昔杜暹藏書每題跋尾曰請俸買來手自校讐及借人爲不孝言雖未大亦自痛切矣

觀書三益

陳貞鉉曰客來觀書病懶時頗厭其煩然有三益不可以厭煩而廢賤性善忘經目輒忽獨對客搜尋之事雖閱年能記一益也覽所不及度床便蠹因客披搜二益也習懶成病偶因客至整書忘疲亦古人運甓之意三益也夫學求益

也一益尚可況三益乎

讀書樂

余嘗謂人生之樂莫過閉戶讀書得一僻書識一奇字遇一異事見一佳句不覺踴躍雖絲竹滿前綺羅盈目不足踰其快也六一公有云至哉天下樂終日在几案余友陳履吉云居常無事飽暖讀古人書卽人間三島皆旨哉言也

四觀

友人陳貞鉉曰室廬雖陋取足庇身况有架書之所作廣廈觀薄田自供取足糊口况稟淡薄之訓作京坻觀擁書萬卷取足娛志况嗜爨鼎之玩作極樂觀城居習懶取足鎮喧况耽禪室之趣作清淨觀

借書

陳貞鉉曰古人衣裘與敝書不借人則疑于不廣非不廣也置書之勞不畢世不已借書之敝多致遺亡點汙則其掛懷不至於再置不已使書可再置抑又何嫌間或重帙善本抄篇集函

一
非通都大邑不購非良緣竒遇不值非閱年積
時不成偶欲披閱或方借而未還或已借而既
失至于撫卷痛恨不如不借之爲愈也客曰如
是書終不借人乎居士曰書亦何可不借人也
賢哲著述以俟知者其人以借書來是與書相
知也與書相知者則亦與吾相知也何可不借
來借者或蓄疑難或稽異同或補遺簡或搜竒
秘至則少坐供茶畢然後設几持帙恣所觀覽
隨其抄謄請主客無相妨尋常供具不爲添設

絕不置酒恐緣酒而狼戾書帙夫如是或竟日
或數日或十數日子俱不厭客亦無猜若欲以
半部一函持借出門僕已具觴酌誓于大聖大
賢之前斷斷不爾人各有願幸毋相強

贈遺得人

宋虞世和甫最愛黃庭堅每得佳墨精紙竒玩
必歸魯直國初王羽儀之最善楊士奇楊喜收
書或數月不相見相見輒贈一書皆贈遺得人
者也

秘書

蔡邕秘論衡于帳中或搜得之輒抱以去又家有書萬卷末年載數車與王粲何私一論衡而萬卷不之惜耶蓋搜得論衡者未必爲邕意中人固宜珍秘而仲宣素有異才卽捐數車之與不爲傷惠要在得其當耳今世以書爲羔雁連篇累牘贈送貴人貴人全不知惜膏蟻飼鼠予者非邕受者非粲徒爲典籍一厄與其爲貴人屑越寧秘帳中

異書

余嘗語曹能始云有異人其家必有異書常人之家必有常書俗人之家無書矣欲求異書先求異人不遇異人勿問異書

書不讐校

比齊書邢子才有書甚多而不甚讐校見人校書常笑曰何愚之甚天下書至死讀不可遍焉能始復校此且誤書余嘗披覽抄本之書十訛二三難以句讀令人燥熱又無處借書校對偶

及邢事心神頓涼

兩脚書厨

永樂中毘陵陳濟善記書文廟謂爲兩脚書厨
古人號書厨者有矣此云兩脚文皇亦善諧謔
也

博物

史稱張華博物識劍識狸及著博物志信矣然
左傳引叔向之言曰子產博物君子也又曰延
陵季子閱覽博物君子也然子產季子不以博
物名惟張華爲著

讀書飲酒

謝少連云讀書須少年僻地靜夜早晨阮堅之
云飲酒須淡酒小杯細談久坐二君得讀書飲
酒之趣可謂名言

痛飲讀離騷

離騷悲憤令人讀之不歡故昔人有云痛飲讀
離騷蓋醉而後讀始不爲鬱悒幽憂之氣所擾
耳曹孟德云惟有杜康可以解憂正此意也

囊螢

隋煬帝宮中囊螢爲戲車胤無油囊螢讀書丁
朱崖囊螢當火恐熱氣蒸人同一螢火而所用
苦樂迥別

書畫碑版

陳眉公云見古人書畫如見家譜豈容更落他
人手見古人墟墓碑版如見先壟間物豈容更
落樵采不呵護名言也

趙家書畫

趙文敏善書畫而妻管夫人子雍樂弟孟頫孫
鳳麟甥王蒙皆以畫名于時惟樂以書名不聞
能畫

吳興三絕

元季吳興馮應科筆與趙子昂字錢舜舉畫稱
三絕

瓦官秘藏

南部烟花錄得之瓦官寺廢閣王右軍告誓文
真蹟亦得之瓦官寺鴟吻內竹筒中何此寺之

多秘藏也豈支許輩所留耶

書法 以下書學

六一居士筆說云古人皆能書獨其人之賢者
遂傳遠後世不推此但務於書不知工於書隨
與紙墨泯棄者不可勝數也使顏魯公書雖不
佳後世見之必寶也又云學書當自成一家之
體其摹倣他人謂之奴書今人肉眼妄評某人
書酷肖某帖不論其人之賢否正蹈六一居士
之誚耳嗚乎此但可與知者道也

古書古帖

養生家云目不醫不瞎耳不挖不聾予喜書古
書古帖嘗語人云書不裝不蛀帖不裱不蟲通
來書板極善但一加外面不久生蟬藏書家須
急去之勿惜也

八分書

子美李潮八分小篆歌云尚書韓擇木騎曹蔡
有鄰開元以來數八分潮也奄有二子成三人
然此三人書皆不傳

扇書杜詩

宋高宗紹興元年賜經筵官扇皆取杜甫詩句
親書與之賜學士王綯曰霖雨思賢佐丹青憶
老臣賜尚書胡直孺曰文物多師古朝廷半老
儒賜舍人胡交曰相門韋氏在經術漢臣須高
宗之光寵儒臣如此

四十二章經

錢塘六和塔上刻四十二章經乃紹興中諸名
臣分寫者沈該湯思退陳誠之陳康伯王綸賀

允中葉義問楊椿周麟之洪遵楊傑沈介趙令
諤孫道夫王希亮黃祖舜張孝祥宋棐金安節
董莘李洪錢端禮張宗元張運楊朴莫濛路彬
張庭實周操葉謙亨胡沂陳俊卿鮑彪陳棠楊
邦弼張洙黃子淳楊倓沈樞韓彥直虞允文洪
邁共四十二人皆以官爵序次字俱生硬無晉
人筆法蓋此四十二人無一人以書名者也惟
錢端禮虞允文差勝耳

僧善書

隋唐善書僧三人智永懷素高閑也智永懷素
今墨本紛紛摹刻惟高閑甚傳

戲魚堂帖

宋劉次莊謫居臨江卜築鑿池東山自摹淳化
帖十卷刻石置堂中時稱戲魚堂帖今在新淦
縣東山寺前

寶晉齋

宋元章守無爲州州治東北建寶晉齋有法書
碑刻直壁間因名

鄭回溪父子書學

宋乾道五年狀元鄭僑本永福人家與興化隣
後寓莆中淳熙間使金不屈官至參知政事著
書衡三篇號回溪善行草書其子寅官至樞密
承旨著包蒙七卷號肯亭亦善書二公書名不
顯著作無傳近見元人鄭灼所傳衍極專論字
學多引述之而其論書亦博綜今古惜無全文
耳

董山書史

宋鄭昂字尚明號董山祭酒鄭穆之孫也作書史起伏義終五代凡二十五卷今軼弗傳昂善書九仙山蓬萊峰盤石上有題名徑尺許古勁絕倫昂所書也

陳述古書

吾閩古靈先生陳述古書法在蔡君謨之右學柳誠懸酷肖也烏石山平遠臺鼓山臥龍山俱有題名鐫之石壁皆徑五寸鮮有知其妙者

寺額名書

衍極載元人陳旅題署書記畧中一段云閩中風俗以正月六日游烏石山寺其外大父趙大蓬指寺額曰是古題署法書也古時人人知有是法王公貴人有所建立不能書不書必求能書者雖微賤必書也紹興後無論能否官大卽書一時迎合爭乞新題易舊榜于今存者什之一耳米南宮黃太史非不爽峭可喜直可施之亭榭宴遊處唐以來惟顏太師雄秀而題署李北海爲最云

古磚

杭吳山萬曆乙巳年里人建水神廟于上奠礎
日豐草中的際有光視之則古廢磚方二寸許
上有安寧萬姓四字類蘇長公筆法今在廟中
中元大鵬年號

先輩陳中丞達嘗于荒莽得石盆甚巨背刻中
元庚申僧本茲造八字按中元乃光武年號光
武無庚申庚申乃明帝之永平三年也今石盆
尚存近余友林熙工掘地得古磚刻大鵬二年
大鵬年號無攷書之以質博雅者

古鏡

餘姚孫忠烈公初巡撫至江西治廨舍得古鏡
于深溝中背刻其文曰光運忠扶日月心感天
揚顯忠獨難塞天不世內靖斯以昭明字畫奇
恠觀者多不識後孫公死好古者以意辨之其
文乃著

銅鼎

嘉靖初海虞王澄嘗獲一鼎其識曰維紹興丙

寅三月巳丑太師秦公櫓一德協濟配茲乾坤
乃作劔鼎賜家廟以奉時祀子孫其永保是高
宗所賜櫓之所受者澄鄙其事乃卽家山作萬
松樓祀岳武穆而以鼎奉焉

黃云以秦鼎祀岳
恐岳未必饗也

西園雅集 以下盡

宋駙馬王說晉卿延東坡諸名流當時李伯時
寫爲圖今世遞相傳摹歲月旣無所攷西園亦
莫究何在然其人米元章有圖序甚詳國初黃
文獻楊文敏林尚默各有攷據儒衣冠十四人

蘇東坡王晉卿張文潛蔡天啓李伯時蘇子由
黃魯直陳無已李端叔晁無咎米元章王仲至
劉巨濟秦少游也釋道各一人僧圓通道士陳
碧虛也侍女二人晉卿家妓雲英春鶯也

唐文皇像

余嘗見閭立本寫文皇御容絹素僅尺許虬髯
鳳目神彩煥發傍署云臣閭立本寫今藏薛中
丞家

宋太祖像

先伯兄舊有趙文敏寫太祖真像擊球圖桑皮紙游絲金筆濶僅尺餘今在泉南丁司寇家

膠山絹海

古畫多用膠礬着絹唐宋名家皆然惟元倪瓚輩始喜寫生脫畫家蹊徑唐章孝標咏畫屏風云雨滴膠山斷風吹絹海秋唐宋畫全用膠礬此是一證

古碑

以下碑版

三代碑刻至今存于世者唯响嶮碑與周石鼓文耳秦則李斯斷碑僅二十九字漢蔡邕石經與孔廟中郎碑陳思王碑蜀有樊侯碑餘俱不可覓

曹娥碑

曹娥江在浙之上虞當時孫權據越不知孟德何因與楊脩至江滸讀其碑也殷芸小說云蔡邕刻曹娥碑傍日黃絹幼婦外孫蓋白魏武見不能曉以問群僚莫有知者有婦人浣于江渚日第四車中人解之乃禰正平便以離合解為

絕妙好辭此說與諸書所載大異余謂孟德決無到曹江之理或是當時傳印邯鄲淳曹娥碑文而孟德與楊脩猜度之只見墨本非親摩碑石也彌衡之解又不知何據語林云操讀碑於汝南其爲摹本無疑

泰山碑刻

泰山秦碑李斯篆在秦觀東廳壁僅存數字唐摩崖碑隸字在岳神祠後爲苔蝕其半李白遊泰山詩六章篆刻方石豎會真宮東廡

無字碑

泰山頂有秦無字碑唐武后乾陵亦有無字碑蓋碑緣文而立立而無字誠不可曉

番君碑

饒州番君廟碑趙文敏書厚七八寸文敏在京郡人欲乞其書碑重不可載乃鋸其碑面寸許載至京文敏書畢仍合豎之予至饒見其合縫宛然昔人之好事如此書法遒勁因搨數紙以歸

畫錦堂碑

姑蘇志云國初陳僖敏公治宅吳城闢地得蔡君謨所書畫錦堂石碑按畫錦堂在相州君謨所書碑字甚鉅何因得至蘓州歐陽文集中言書碑事甚詳未聞有兩書者豈後人重君謨筆法重摹刻之如今之間門翻刻法帖碑本之例決非宋碑也

武夷唐刻

武夷三十六峰題刻甚多而唐刻絕少舊傳幔亭峰下唐明皇遣使祀仙刻大唐天寶七載歲在戊子七月封名山大川登仕郎顏行之記共二十四字今不可覓或云石墜水中矣也

虎渡橋碑

漳州江東驛虎渡橋左有碑魏然是宋淳祐中狀元黃朴撰文併書字法全類柳誠懸石材完好惟篆首缺墜耳余以癸卯冬與曹能始觀賞各搦一通第鄉人不知重無有覆瓦爲亭者惜哉

碑厄

水經注洛陽天淵池中有魏文帝九花樓殿基
悉是洛中故碑累之澠水閒談云景祐初姜遵
奉太后意悉取長安碑石爲塔材道山清話云
天聖中詔營浮圖姜遵在永興毀漢唐碑之堅
好者以代碑甃 國朝太祖登基金陵悉取六
朝舊碑砌作御道唐歐陽詹集云九江有祖將
軍廟碑顏真卿撰文并書後州吏有脩坏之勞
狀其末蹟刻磨舊文詹作文以弔之平淮西碑
先琢韓退之而刻段文昌宋郡守陳某又琢段
文更刻韓文一石遂遭兩厄湖州天聖寺趙孟
頴撰書錯盤龍碑記國初昇入郡治作太守去
思碑歐陽公金石錄所收古刻千卷今什不得
一二皆遭此數厄耳

黨籍碑重刻

元祐黨籍碑蔡京欲傳示後世使其子孫有餘
辱也弘治中吳興沈疇以其祖沈千名與涑水
伊川聯名懼其久而磨滅取搨本重刻于石今

世所傳碑皆沈氏刻子孫有餘榮矣

元程二守

元絳程師孟宋熙寧中先後守福州山劄石刻多二公筆至今傳爲佳事佳話興除舉廢皆稱二公二公俱吳郡人生平稱臭味交故出守行事亦大相類

丁刻字

趙承旨時鄱陽丁信可者善刻字凡承旨書極喜信可鐫刻打搨他手不如也番君廟乾元寺二碑承旨所書皆信可刻今信可子孫猶日搨賣丁氏食此碑已十餘世矣他人不得搨也余至鄱陽目擊之

袖皮打碑

桂海虞衡志云打碑用柚子皮蘸墨以代理宜墨而不損紙試之良然

長慶石

萬曆甲申吳興張穉通卜築玲瓏山得一石乃唐長慶間陸羽故物高可尺許有孟郊題曰長

慶甲辰餘英孟郊來訪竟陵陸宵翁字法適古
尚未剝蝕稱通造軒貯之名友石軒好事者皆
爲題詠後贈謝在杭爲王百谷索去今爲王氏
家物

文人 二十四則

游夏文學

聖門列四科惟以文學許游夏子夏於易則有
傳於詩則有序於禮則有儀禮喪服篇於春秋
則授之公羊高穀梁赤於論語則鄭康成以爲
子夏與仲弓所撰定者許以文學夫何忝哉不
知子游當時有何文學而魯論稱之也當是世
遠而撰述不傳耳若非魯論并稱之後世孰知
子游亦文學也哉

徐氏文人

古今文人之盛惟徐氏歷代不乏建安七子則
有徐幹一代文宗則有徐陵河東三絕則有徐
彥伯江南文士則有徐鉉徐鉉詩派法嗣則有
徐俯晚宋四靈則有徐道暉徐致中國初四家

則有徐賁盛明四家則有徐禎卿中原七子則有徐中行此皆丁極盛之時而文士輩出名震霄壤者至于單詞片語流傳文苑不可勝紀矣

祖孫

王羲之七世孫曰僧智永謝靈運十世孫曰僧皎然書法詩學皆不愧祖風後世侈譚之不因沙門而薄其祖先也韓侂胄爲韓魏公之裔時論爲之嘆息豈紫衣宰相反不如緇衣髡徒乎信所重在彼而不在此也

江淹夢

史稱江淹夢張景暘寄錦取還文章日躋又謂夢郭景純索舊筆還爲詩才盡何二夢相似之甚然則淹之詩賦皆少作邪

沈約

獨異志云沈約家藏書十二萬卷然心僻惡聞人一善如萬箭攢心噫此謗語也劉勰著雕龍旣成未爲時流所稱取定於沈約投之車中約取讀大重之嘗陳諸几案倘萬箭攢心定不爾

爾

嚴武不殺杜甫

新唐書嚴武傳云武最厚杜甫然欲殺甫數矣
甫本傳云武欲殺甫集吏于門武將出冠鉤于
簾者三左右白其母奔救得免而舊史甫本傳
云甫登武床瞪目視曰嚴挺之乃有此見武雖
急暴不以爲忤然則武未嘗欲殺甫也武卒甫
賦八哀詩云空餘老賓客身上愧簪纓甫之感
武者至矣豈人有欲殺我者而反哀之耶必不
然矣

李杜子孫

盛唐詩人莫過李杜其子皆早夭至孫曾則泯
然矣晚唐詩人莫過元白又皆無嗣惟韓退之
子杲孫綰袞俱登進士蟬聯金紫天之報施誠
不可知

李益

柳子厚爲其父作神道表碑陰載其先友六十
七人凡天下善士舉集焉知名者僅二十人其

中能詩者李益一人而已唐以詩程士爲官者未必人人知詩也六十七人劣得一李益不亦難乎。

賈島馬端臨嚴羽羅願

賈島詩歌清淡奇峭可與孟郊張籍比肩舊史不爲立傳新史附名韓愈之後數言而已馬貴與博洽卓絕古今嚴儀卿論詩理入三昧羅端良翼雅富如武庫宋史俱不爲立傳并附名亦然之史臣之不公如此蓋冠蓋之華易登史冊布衣之傑難上石渠賈島官不過主簿貴與儀卿終身草茅端良位不甚顯故史臣特畧之然數公之名自有不朽信夫文士不因位顯亦不藉史傳也

文士好奇

唐劉蛻取生平所爲文千一百八十紙起塚以封之自作銘曰文乎文乎其鬼神乎風水惟貞將利其子孫乎白居易寫生平所爲詩四部置諸四大藏經中與寺僧約曰不出院門不借官

客有好事者任就觀之唐求詩成置之木瓢任
流江中識者得之曰此唐山人詩瓢也陸龜蒙
以平日詩文稿藏之像設腹中至宋咸淳中里
人醉仆其像腹稿始傳南齊褚澄著遺書十卷
刻石納之墓中後群盜發墓得蕭廣父子釋義
以傳古人藏文各剗獨見不相師襲元魯脩鄱
陽人有詩朋十人皆工詩賦恐罹兵燹失傳埏
埴爲甃刺瘞山中名曰詩塚宋濂爲之銘蓋倣
劉蛻也劉蛻文塚在今蜀梓州南二里兜率寺
庭前古栢數百株皆虬枝龍幹至今尚存

香山飲酒

白香山喜飲酒每飲必賦集中飲酒詩九百首
今人無香山之詩沉冥麴蘖只可目爲酒囊非
真能飲酒者也

樂天詩友

白香山詩與元微之倡和什有六七元白齊名
微之爲樂天作詩序手自排纘成五十卷不可
謂不密矣乃樂天作醉吟先生傳云與嵩山僧

如滿爲空門友平泉客韋楚爲山水友彭城劉
夢得爲詩友安定皇甫朗之爲酒友歎不及微
之誠不可解

元微之

元白雖齊名而微之品格不逮樂天遠甚微之
少通崔鶯鶯作會真記暴其事旣通籍又夤緣
宦官得知制誥爲武儒衡鄙厭恬不知惟文人
無行殆斯人與

温李

北夢瑣言云温廷筠舊名岐一名廷雲與李商
隱齊名時號温李今皆以李賀爲温李非也

誌銘兩手

明道間洛陽張堯夫卒尹洙作墓誌歐陽脩爲
之銘志銘出兩手亦古今希觀也

憐才

王荆公見劉季孫杖藜携酒看芝山詩卽判監
酒稅見盧秉但得有錢留客醉之句立薦于朝
因登卿貳秦檜聞陸士規黃陵廟一絕傾倒如

平生若宰執不憐才反荆公秦檜之不若矣

進稽古錄表

司馬溫公撰稽古錄成黃魯直爲作進表今黃集刻之司馬集刪之可見古人文宇無所假借亦不掩爲已有也

祭文

黃參

宋張子韶祭洪忠宣曰維某年月日某官謹以清酌之奠致祭于某官之靈嗚呼哀哉尚享其子洪邁深感其情今世祭文濫觴可厭使人人如子韶不知省許多紙筆黃云文以足言言以足志如子韶云云不幾于沒字碑乎豈可爲訓

惟

武廟祭斬文禧云朕在東宮先生爲

傅朕卽帝位先生爲輔朕今渡江聞先生訃嗚呼哀哉則言簡意盡者也

彭乘鄭景望張世南

宋彭乘著墨客揮犀鄭景望著蒙齋筆談張世南著游宦紀聞三公言閩事甚詳蓋曾宦于閩者郡志俱逸其名尚俟攷其人而增之

黃華澹游

金王庭筠字子端河東人大定間舉進士官不
達寓彰德黃華山寺自號黃華老人善草書有
文集四十卷子曼慶亦能詩自號澹游善畫竹
仕至行省郎中

句曲外史

元茅山道士張天雨自號句曲外史工書善詩
宋張九成之裔孫也

耽犁生

洪武初長樂鄭琳自號耽犁生讀書播耨不
聞達同時與鄭定助教友善練子寧有耽犁生
賦張顯宗爲之跋又有建安蘇伯厚張智等詩
文子萬奎爲廣州教授郡志所不載

文人慳一第

國朝科目限人長才者或慳一第如文徵明王
寵文彭文嘉何良俊田藝蘅歐大任文章俱足
名世獨慳一舉竟以歲貢起家豈非命耶

郎田二先生

杭州近代博雅君子仁和郎瑛錢唐田藝蘅瑛
字仁寶號草橋少孤長爲諸生尋謝去家故饒
一以購書所藏載籍古圖畫金石刻甚富而貧
口貧瑛無所顧歎敞大屋樹高皮列置數几危
坐諷誦辨異同所著有訂正孝經大學格物通
各一卷萃忠錄一卷青史哀鉞六十卷後昆軒
然俱軼弗傳傳者七脩彙稿耳藝蘅字子藝號
香宇性放曠不羈善酒任俠喜著書生平所著
文集前後數十卷老子指玄一卷煮泉小品一

卷梅花新譜一卷詩女史二十卷留青日札四
十卷晚歲以貢爲新安博士歸常衣絳衣挾二
小鬟遊湖上或逢友人則令小鬟進酒促坐談
謔時時挾內人遍遊諸山日暮無驢覓得其一
乃與內人共跨一驢入城藝蘅詩文在六朝初
唐間駸駸入作者之室瑛辨証攷核不減藝蘅
至于談詩猶說夢也然瑛事母孝兩割股皆愈
內行尤可述耳

人物攷

二十七則
女八則

男十九則

杜宇鼈靈

戰國時杜宇君于蜀舉荆人鼈靈治水水既平
禪之位死皆葬于郫今郫南一里二塚對峙鼈
靈一云鼈令

八公名

蘇飛李尚左吳田申雷被毛被伍被習昌

兩京房

漢有兩京房一爲楊何弟子官齊郡太守宣帝
時人一爲焦延壽弟子東郡頓丘人其說長于

災變今漢書京房傳及世所傳京氏易傳皆延
壽弟子也

林間

林間氏揚雄之師也見路史七卷第十三之註
白帝非叛

王莽篡漢凡世之豪傑有志天下者皆得起而
誅之公孫述欲誅莽非一日也方豪傑群起之
時孰不欲頓入絃都萬乘述不得罪于漢而盡
有益州之地子養一方者十有三年大有功德

于蜀臨陣殞命與國存亡一念不降可謂賢矣
史書述叛豈可與叛漢者同科按更始二年述
自立爲蜀王明年夏四月改元龍興是歲漢世
祖以蕭王卽位鄱南改元建武是爲光武皇帝
當是時雌雄未定成敗未分萬一使述功成則
光武亦爲僭亂耳然光武漢裔漢德方興蜀僻
一隅成功匪易述與光武猶項羽之高祖也書
之爲叛不亦過乎

寶誌公楊大年

寶誌公宋元嘉中現于東陽郡古木鷹巢中手
類鳥爪朱氏婦聞巢中兒啼遂收育之因以朱
爲姓楊大年始生則一雀雛家人驚駭貯而棄
之江其叔父異之追至江濱開視則雀蛻嬰兒
具焉體猶有紫毳尺餘旣月乃落世間恠事往
往有之不但后稷之生爲異矣

白馬三郎

常山有白馬三郎廟宋季禱旱有應紹興中龍
圖梁默奏于朝曰白馬三郎王審知號也生前

已享王爵不宜猶用軍中之號改額昭應常山
與閩接壤至今祠祀

陳冕

陳子昂字伯玉見盧藏用敘并唐書獨雲溪友
議載陳拾遺名冕字子昂雲溪唐范攄也當必
有據

雪峯檀越

雪峯祖師初至福州求一菴基弗得候官人藍
文卿指門首池畔大枯樹下草菴與師居之唐

咸通十一年見四方雲衲奔湊難安廣衆將所
居屋宇三百餘間米倉十二間庄田二十所水
牛三百六十頭諸庄田地各立契書分明歲收
米一萬一百石淨盡捨入常住建大梵剎卽今
之雪峯寺也乾符二年閩忠懿王具奏僖宗勅
號禪師真覺大師封檀越藍文卿明護侯王男
藍應朝通祐神君今護法伽藍寔文卿父子也
數百年香火

不絕使當時不發心捨此誰其
逼之文卿不難一決不惟獲福田利益而寺存

已享王爵不宜猶用軍中之號改額昭應常山
與閩接壤至今祠祀

陳冕

陳子昂字伯玉見盧藏用敘并唐書獨雲溪友
議載陳拾遺名冕字子昂雲溪唐范攄也當必
有據

雪峯檀越

雪峯祖師初至福州求一菴基弗得候官人藍
文卿指門首池畔大枯樹下草菴與師居之唐

咸通十一年見四方雲衲奔湊難安廣衆將所
居屋宇三百餘間米倉十二間庄田二十所水
牛三百六十頭諸庄田地各立契書分明歲收
米一萬一百石淨盡捨入常住建大梵刹卽今
之雪峯寺也乾符二年閩忠懿王具奏僖宗勅
號禪師真覺大師封檀越藍文卿明護侯王男
藍應潮通祐神君今護法伽藍寔文卿父子也
歷數百三火不絕使當時不發心捨此誰其
逼之文卿不難一決不惟獲福田利益而寺存

則香火未以不墜今之擅文卿之富者不乏其
家產留以遺所不知何人至於布施錙銖慳惜
悲夫悲夫

鐵冠道人

蘇子瞻在海外自號鍊冠道人詹仲和亦號鍊
冠道人楊廉夫亦號鍊冠道人洪武初有鐵冠
道人張景華常與
太祖言休咎未來事

龜字諱

唐宋人不甚諱龜字張志和始名龜齡開元歌

者名李龜年陸魯望名龜蒙白樂天幼子名龜
郎咸通中會稽太守王龜殷踐猷號五總龜皇
祐殿中丞李龜齡宣和進士戴龜朋彭千壽名
龜年善畫者劉崇龜陳朝瑞名總龜王十朋字
龜齡楊時號龜山崇寧中黃德邵名龜年淳佑
中栝蒼教授潘元龜洪駒父兄字龜父咸以龜
爲美稱也然蘇子瞻嘲呂微仲晝睡有六眼龜
口號則宋時亦以龜爲戲謔耳予謂十朋千壽
中立德邵皆在子瞻後豈子瞻時有此謔而後

人徑取以爲號耶大抵子瞻謔事多出宋元小說假托爲多未必有是事耳但不知龜字諱于何代近世以龜命名者絕少獨鉛山費冏卿弟名龜年官廣西灌陽知縣惠安亦有楊龜年官教諭

潘陳同母辯

齊東野語云陳了翁之父尚書與潘良貴之父義榮情好甚密潘一日謂陳曰吾二人官職年齒種種相似歟有一事不如公甚以爲恨陳問之潘曰公有三子我乃無之陳曰我有一婢已生子矣當以奉借他日生子卽見還旣而遣至卽了翁之母也未幾生良貴後其母遂來往兩家焉一母生二名儒亦前所未有事噫此說荒謬不根之甚也爍按了翁年譜父陳備仁宗朝爲吏部尚書以嘉祐二年生了翁年二十三登進士至宣和六年卒享年六十八又按朱子文集良貴父名祖仁贈中奉大夫未受宋官所云官職相似一謬也了翁宣和六年卒良貴宣和

初始爲博士歲月相遠二謬也朱子爲潘時作墓志銘云良貴有兄良佐以儒學教授諸弟良貴從授學是祖仁已有長子安得言無子三謬也了翁閩沙縣人良貴浙金華人其母安能來往兩家四謬也欲誣名賢荆爲不根之說名曰齊東野語豈虛也哉

菊坡

宋季崔丞相與之號菊坡至八世其家有菊數本皆一蒂兩莖人咸異之

以字行

國初名臣多以字行楊士奇名遇練子寧名安黃子澄名湜李時勉名懋李至剛名銅唐之淳名愚士吳伯宗名祐張孟兼名丁劉伯序名秩董良史名紀鄭居貞名恒許廷慎名伯旅胡虛白名奎李昌祺名禎王汝玉名璉劉三吾名昆孫桂彥良名德稱金幼孜名善劉子欽名敬錢習禮名幹周是脩名德劉季篪名韶至于蹇義舊名瑤楊榮舊名子榮胡靖舊名廣李騏舊名

馬皆出 上賜也

葉給事

秀水屠侍御撰建文朝野類編會輯諸書詳備周悉有葉福字叔疇閩縣人建文庚辰進士授給事中極言宗室之非宜建文君怒杖幾死亟遣人歸養其母靖難兵攻金川門首犯其鋒死衣冠歸葬久諱其事楊文敏公入省求其從孫爲文碣其墓萬曆初奉恩詔祀于鄉賢祠林文恪公脩郡志始爲立傳人鮮知之故屠侍御未

之列也當時吾郡死建文之難者止福一人而古田林英字章叔爲御史自經死妻宋氏亦自經皆彙編所不載按朝野彙編乃陳眉公所纂名史待屠侍御借爲已書更名彙編志吾閩死事者止陳彥回陳繼之而不及福與英今史相國世程官南少宰日率同鄉建三忠祠清涼山祀二陳與福英猶缺焉蓋當時無有知其事者志之以俟後人補此佚典也

孫太初攷

太白山人孫一元同時諸公與之倡和寔不知其何許人鄭善夫序其詩曰關西豪傑也李夢陽殷雲霄劉麟皆云關中人惟王世貞云太初裔本王家託跡方外馮夢禎云關西王孫易名爲孫一元焞近閱徐渭逸稿孫山人考云孫一元父早亡而貧以抄書役某府中府公嘉之爲出貲特補吏密事多任之會覲橐白金四百兩使山人致布政使途被盜無以報命遂亾抵浙寓西湖休寧有范燦者其祖與山人交厚燦告

渭曰嘉靖某年諸暨縣丞孫鏞罷官歸寓江都燦大父世商於鹽遇鏞頗傾蓋一日偶及山人事鏞大駭一一道山人出亡事便取所隨譜合之鏞卽携其子來子貌亦似山人鏞遂問吾叔今何在燦大父云云鏞強大父偕至湖州拜其世母施氏并其已嫁妹三人相對而哭渭攷諸暨官師表嘉靖十二年縣丞果孫鏞也乃曰蜀人山人舊自稱秦人非志者悞乃山人謬託爲秦人也觀渭斯攷則太初非宗室亦非

關中人也明矣

嶽禱

太宰倪公岳父尚書文僖公嘗代祀北嶽以禱
祀而生公故名豈維嶽降神耶

滇二孝子

滇南范寅爲諸生屢試不第遂成心疾出游不
知所之嘗語其子師顏云吾葫蘆山人也爾他
日於此訪我師顏尚幼旣長補諸生以嘉靖壬
子舉於鄉鹿鳴次日卽裹糧之四方尋父凡山
岩市鎮僻壤遐陬無弗到行三年至蜀有葫蘆

寺扣主僧謂三年前有稱葫蘆山人者寓此今
化而瘞之近岡且出其手札真寅筆也師顏慟
絕芟莽得穴刺血入骸斂而返墓焉御史黃中
疏而旌之又有趙重華大理太和縣人父廷瑞
亦諸生亦以不第遠遊莫知所往華甫七歲至
年二十一母沒乃出尋父榜其背曰萬里尋親
至武當山有字云嘉靖四十四年十二月二十
二日大理趙廷瑞至此華至日乃萬曆六年十
二月二十二日也又間關至建康祈于三茅君

夢玄帝謂之曰爾父故在如是者三覺而由丹陽至毘陵遇老僧示往無錫南禪寺語訖不見明日至南禪見皤髮老叟曝背廊下華心疑之伏地曰我雲南人叟曰我亦滇人出遊時一子七歲亦潛然淚下各道姓名相持而哭迎歸故鄉茅坤爲文以紀之

長人

苻堅時有夏默獲磨鄔申香三人身長一丈八尺並多力善射三人每食飯一石肉三十斤

翟母漂母

以下女人

漢高帝厄於楚餒甚翟母常饋食及帝業成母已死矣高帝封其墓至今名封丘縣漂母哀韓信而進食後報以千金至今廟祀所謂一飯之德不忘也今人報德如漢君臣者鮮矣

美人名風

晉世美人以風名者惠帝皇后諱南風洛中謠曰南風烈烈吹黃沙石崇婢名翔風

翔風

石崇妾名翔風諸書互見不同有曰朔風有曰
翺風翔朔翺三字相類必有一定者

衛夫人

衛夫人名鑠字茂漪晉汝陰太守李鉅妻王逸
少之師也

崔鶯墓志

志稱崔鶯鶯嫁太常寺協律郎鄭恒恒字行甫
文業著于當時享年六十夫人崔氏享年七十
有六子六人秦貫纂為銘其墓誌銘久瘞土中

明成化間黎人得諸廢塚塚居邑之西北五十
里曰舊魏縣蓋古之淇澳也乃鬻之崔氏為中
亭香案石又若干年而莫之知尋得其家有胥
吏名吉者識之遂白于邑長吏邢公邢置之邑
治而其迹始著陳眉公收其文于古文品外錄
欲一洗崔氏冰玉之耻予謂會真之記出諸微
之鶯鶯之名因以大著若讀秦之墓誌不過尋
常一貴人妻耳何足奇

李易安

李易安格非之女也格非字文叔濟南人見張
文潛集

易安更嫁

李易安趙明誠之妻也漁隱叢話云趙無嗣李
又更嫁非類且云其啓曰猥以桑榆之晚景配
茲駟驢之下才殊謬妄不足信蓋易安自撰金
石錄後序言明誠兩爲郡守建炎巳酉八月十
八日疾卒且云余自少陸機作賦之二年至過
遽瑗知非之兩歲三十四年之間憂患得失何

其多也作序在紹興二年李五十有二老矣清
獻公之婦郡守之妻必無更嫁之理今各書所
載金石錄序皆非全文惟余家所藏舊本序語
全載更嫁之說不知起于何人太誣賢媛也容
齋隨筆及筆叢古文品外錄俱非全文

眇倡啞倡

秦少游傳眇倡云倡貧不能自贍與母西遊京
師京師色府也美盼巧笑以千萬計若具兩目
猶恐不售况眇一焉其瘠于溝中必矣行抵梁

舍於濱河逆旅有少年見而悅之爲留飲終日
因大嬖娶置別第謝絕姻黨身執爨以奉之倡
飯少年亦飯倡疾少年不食或有嘲之少年忿
曰自予得若人視世之女子無不餘一目者夫
佳目得一足矣奚以多爲楊廉夫傳啞娼云倡
錢唐人也生無啼聲父母欲棄之年及笄天質
秀利中益警頴京師有大木賈過錢唐聞啞娼
名求見大喜倍價聘之左右曰娼以聲取悅啞
而倍價以聘何愚也賈曰婦以長舌敗人之家
予聘無長舌不聘工歌且笑遂挾之歸賈侍姬
百十人啞娼寵專房一飲食非啞娼不甘賈婦
死推啞娼爲繼生三子焉夫倡至于眇啞宜乎
無顧盼者乃少年大賈娶之少游廉夫傳之信
乎物無定價隨所遇也

名人生卒墓地

十四則

名姬附

許由塚

箕山有許由塚乃石槨歲飢有惡少發之輒合
至今猶存

扁鵲墓

湯陰有扁鵲墓墓前有土可以療飢鄉人試之輒驗亦理之渺茫者

徐君墓

黃參

一統志河南襄城縣城北二十里有徐君墓墓前有樹相傳為季札掛劍處名曰靈樹按史季札使魯過徐其地今在泗州襄城非徐地安得有墓吳從而掛劍哉史稱札還至徐徐君已死則其死在徐明矣其曰解劍繫其塚樹則其塚

在徐亦明矣襄城靈樹之說何據

徐君墓在張湫安平鎮余

舟過其地展墓而酌以詩墓上草名劍草可除眼疾

郭璞墓

揚子江金山雲根島在水中特起志以為郭璞墓在焉六朝事迹謂璞墓在真武湖中大墩上璞為王敦所害當時必有收其骨者後世皆指水中之山為璞墓者以璞精地理必擇其奇處而名之金山真武湖之說謬也

李白生卒墓

李白舊史稱山東人父爲任城尉因家焉流夜
郎赦還醉死于宣城新史稱白生于巴西卒塋
姑孰東麓元和末觀察范傳正祭其塚訪後裔
惟二孫女嫁爲民妻後改塋青山立二碑焉爍
按全蜀輶文志載唐劉全白作白墓碣記云白
廣漢人玄宗辟翰林待詔因和番書并上宣唐
鴻猷一篇上重之欲以編語之任委之爲同列
所謫詔命歸山遂放浪天下以詩酒自適代宗
登極拜拾遺聞命之後逝矣有子名伯禽全白
幼以詩爲君所知邑有賢宰顧公遊秦遂表白
墳而題其石輿傳于將來也貞元六年四月七
日記以此攷之白非生于山東巴西非死于姑
孰宣城非塋于東麓青山而生當在廣漢墓當
在秦地有子伯禽非斬然後昆也全白與青蓮
同時墓碣當爲實錄二史恐非傳信耳項斯經
李白墓云夜郎歸未老醉死此江邊塋缺官家
禮詩殘樂府篇歸魂應到蜀小碣豈旌賢身沒
猶何罪遺墳野火然

又

李白生卒二史既自矛盾後人又有采石捉月之說愈不足信按李陽冰序謂白疾亟枕上授冰俾爲集序是白死于牖下非江中明矣梅聖俞詩有云便當騎鯨上青天青山有冢人漫傳又信捉月之事矣陳眉公謂李白生于彰明縣青蓮鄉故號青蓮想別有據

杜甫卒年

杜甫生于先天元年壬子卒于大曆五年庚戌

享年五十有九舊唐書云甫以永泰二年啗牛肉白酒一夕卒當是庚午歲尚早四年誤也新史正之云大曆中卒

杜甫卒葬

唐書云杜甫客耒陽嘗遊嶽廟爲暴雨所阻旬日不得食耒陽聶令棹舟迎之乃得還啗牛肉白酒一夕卒王洙序杜詩亦沿史氏言醉飽卒元稹墓志言甫扁舟下荆楚間竟以寓卒旅殯岳陽歿後四十餘年始克葬然則甫之埋骨于

偃師也明矣又按劇談云甫客耒陽一日舟中
飲醉江水暴漲甫爲驚濤漂汎其尸不知落何
處玄宗思甫詔求之聶令積空土于江上曰甫
爲白酒牛炙脹而死按玄宗自蜀歸公方爲諫
官帝晏駕甫在蜀代宗登極八年甫始卒年月
失實不足信也然宋人有題子美墓云一堆空
土烟蕪裏空使詩人悲歎起捉月走入千尺波
忠諫便沉汨羅底固知天意有所存三賢亦同
歸一水則又言甫死于水矣

李賀生卒

宋初唐書李賀傳卒年二十七李商隱作賀小
傳年二十四王元美卮言賀年二十六所載不
一商隱與賀同時當爲實錄

元微之卒葬

南部新書云元稹之薨也卜葬之夕爲火所焚
以煨燼之餘瘞之予按白居易爲元稹作墓志
以太和五年暴疾薨于位六年七月十二日祔
葬于咸陽縣奉賢鄉洪瀆原未嘗言及火焚足

徵南部之妄

白傳墓地

賈氏談錄云白居易墓龍門山河南尹盧貞刻
醉吟先生傳於石立墓側洛陽士人過者奠以
卮酒塚前方丈之石常成泥濘爍按居易志銘
墓在華州下邽縣臨津里北原祔侍郎僕射二
先塋戒沒後勿建神道碑但於墓前立一石刻
吾醉吟先生傳一本可矣龍門山在今西安府
韓城縣東北八十里下邽縣卽古渭南縣在華
州城西五十里相去遠甚賈氏之言似爲無據

梅花道人墓

元梅花道人吳仲珪墓在蘇州武塘題曰梅花
和尚之塔今有橡樹猶存

李空同墓

李夢陽北地人墓在河南府鈞州大陽山侍郎

崔銑作墓志

朝雲琴操墓

朝雲墓在惠州西湖有司爲治墓隧琴操墓在

天目山石佛殿角後人爲之立碑至是山者亦
題咏甚矣人之貴附青雲以不朽也

八倫盛事 十二則

兩世史官

有兩世爲史官者司馬談子遷劉向子歆班
子固王銓子隱姚察子簡李太師子延壽劉
知幾子餗若吾閩林文安三世史官古所希觀

八龍五馬 黃泰

南齊柳元伯子五人皆領州五馬參差于亭唐

殷文圭云荀家門內羅列八龍柳氏亭邊參差
五馬黃云若吾家璞公瞻公兩校書璞公子仁
漑三史仁滢太子正字仁滔御史仁藻著作郎
仁渭秘書監庶子仁澤武狀元世稱一門五學
士家亦何減八龍五馬

文惠文安

宋陳文惠堯佐以太子太師致仕卒年八十二
子十人長尚書主客郎中述古次比部員外郎
求古次主客員外郎學古次虞部員外郎道古

次大理寺評事博古次殿中丞修古次秘書省
正字履古次光祿丞游古次大理丞襲古次太
常丞太祝象古我朝林文安瀚以太子太保致
仕卒年八十六子男九人長鄉進士庭桂次太
子太保工部尚書庭棊次指揮僉事庭楷次慶
遠知府庭杓次廣東都司經歷庭樟次潮州推
官庭榆次上虞縣丞庭枌次鄉進士庭枝次太
子少保禮部尚書庭機古今多福多壽多男子
兩公而外不多見也二公俱史館知制誥俱謚
文而子皆列宦籍尤相等也

狀元宰相

宋狀元爲宰相者六人呂蒙正王魯李迪宋祁
留夢炎文天祥國朝狀元爲相者十四人吳伯
宗胡廣馬愉曹鷁陳循彭時謝遷費宏顧鼎臣
李春芳申時行朱國祚周延儒商輅

浙江文場

弘治壬子浙江文場中夜半場中人見東西立
二巨人一衣緋一衣綠合言曰三人好做事遂

隱不見是年胡公世寧王公守仁孫公燧同舉
于鄉卒之宸濠之變胡公發其奸孫公折其氣
王公平其難三人相次成功云見王允寧孫忠
烈傳

第十九名

建陽李有年舉嘉靖庚子鄉試第十九名其弟
有則舉己酉亦第十九名有年子聞韶舉萬曆
甲午亦第十九名父子兄弟榜次相同亦一奇
也又建寧貳守吳興施可大二子壽明浚明先

後中萬曆壬辰乙未會試俱第十九名尤奇矣

椽曹

國初進取不拘資格有椽史而置身青雲者自
况鍾外不可悉數如閩縣吳復任工部侍郎陳
永祥任惠州知府南平楊文達惠安洪炬俱任
太僕寺丞連江孫瑛任吏部郎中建安盧大政
任吏部主事候官胡鼎任戶部郎中福清游元
欽任濟南通判高世岳任承天通判孫瑛洪武
中陳永祥宣德中吳復胡鼎天順中楊文達洪

炬正德中盧大政游元欽高世岳嘉靖中

父子百歲

義烏人陳世恭至萬曆戊寅年一百六歲子陳迪亦壽九十八歲

福清三老

宋季福清有三老政和間林雄年百七歲紹興中林洞年百十七歲並恩授迪功郎張魏公浚名其堂曰眉壽二子年俱九十餘同時有吳齊年九十三亦恩授迪功郎又蔡伯倫三歲舉神童年八十七卒林瓌年九十卒

烏青九老姓氏

宣德間湖州烏青鎮有九老趙曦官序班年九十一吳煥年九十趙歧年八十九孫孟吉建文中太常博士年八十五水宗達運司年八十二漏瑜建文中御史唐其諒建文中縣丞胡敏錢郁年皆八十漏瑜會稽人唐其諒鳳陽人革除後流寓烏鎮俱能詩結社倡和亦一時之盛

莆田九老八老

嘉靖初莆田有逸老會皆鄉邦之望都憲林茂
達年七十五憲副吳希由逸士林嘉績俱年六
十七御史林季瓊知縣宋元翰俱年六十五憲
副林有年年六十四侍郎鄭岳年六十三侍郎
林富寺丞李廷梧亦幾六十有逸老詩示行于
世隆慶己巳有耆老會太守鄭弼年七十八少
參雍澗年七十七太守陳敘年七十六運使林
汝永年七十五主事柯維騏年七十四太守林
允宗年七十二尚書康大和年七十一大和賦

詩云故里重開耆老會七人五百二十三後尚
書林雲同年六十九亦與斯會真太平盛事也
同居

世傳同居皆曰張公藝九世難矣熙寧中上虞
劉承詔家同居十世四百餘人趙清獻爲越州
具奏上聞旌表其門人鮮知者田子稭留青日
札序至十八世承詔不與

筆精卷之七終

徐氏筆精卷之八

晉安徐 煥興公誤輯

同里邵捷春肇復訂定

溫陵黃居中明立編次

人事 二十五則

積善之家

人行一善可謂之善矣行數善可謂之積善之
人如范希文父子捐麥舟事可謂之積善之家
矣易曰積善之家必餘慶非指一人一事言

也

智岩警語

世有怨府畏途禍胎鬼趣積習晏安於其中未
曾一念覺悟今人於四者無不蹈之後患其能
免乎

罷官蓋棺

見一人罷官功名富貴之念當添一分淡送一
人蓋棺妻妾兒女之情當減一分輕

殺人欠債

諺云殺人償命欠債還錢今之豪家以威勢殺
人貨賄官府卽脫巨室以厚息逼人致死官府
亦不之究是殺人還錢欠債償命也

裸葬

楊王孫家業千金厚自奉養及病乃囑其子裸
葬今人家累千金生前墓鹽布素死而求美木
紵絲祭而烹豕割羊墓而伐石起塚視王孫孰
痴孰達哉

好給沙門

何次道好佛供給沙門而不施貧乏殷仲堪好道不恡財賄而嗇于周急今有佞佛求福者廣施貲財不吝千金而貧交尠一錢之贈與其結納髡徒不如用賑困乏

郡吏碎玉

郡伯喻公政偶裁答遠書呼役取玉印色匣役失手墜地郡伯不問也役請罪反慰諭之次日役重價購匣償公公喜而還其價其雅量與裴行儉吏碎瑪瑙盤談笑自若韓琦吏碎玉杯神色不異何多讓哉

鬱林石

唐末陸龜蒙績裔孫也其門有巨石是績鬱林携歸者至龜蒙時猶世保其居李德裕殷勤戒子孫不聞子孫保守信夫子孫賢不肖非祖父文字可訓戒也今鬱林石移置察院前巍然數尺號廉石吳文定作廉石記

避嫌

宋宰相韓億謚忠憲四子綜絳維縝同奏名禮

部忠憲上疏曰臣子叨陛下科第雖非有司觀望然臣既備位政府天下將謂由臣致此臣教子既已有成又何必昭示四方以爲榮觀哉乞盡免殿試唱第誠懇再三仁宗嘉歎遂俞所請我朝陳循王文之子不第因而彈劾試官萬曆初江陵柄國二子皆及第一子進士未幾削奪流貶方之忠憲能無媿乎

妒婦

南唐樞密杜業妻張氏甚妒烈祖命元后召誠之張雪涕曰業事陛下所藉者駑馬之力未竭耳若縱之反貽其禍將悞於任使矣烈祖獎嘆以銀盤綵段賞之夫妒婦既不利其夫而又甘言以誑人主反獲厚賞可畏哉

惡婦

婦人之惡過於男子生前無論卽死後猶能爲祟如妒婦津是已温韜發掘唐帝諸陵剔取金寶惟乾陵以風雨屢作不能發土人云或有游戲侮慢及取其瓦石皆有靈響

延師舫

陳履吉林熙工皆余友也熙工修淨業足跡渺入城市履吉雅重之一日具贄幣拜熙工爲師執弟子禮特造一船扁曰延師舫履吉長熙工一歲鬚髭盡白同輩無不笑之目爲病狂履吉曰今之司理縣令皆少年科第無道德學問足以教人而人望風投拜惟恐其不我納也一與晉接人以爲榮吾之求師非求少年權貴世自病狂吾何病之有然熙工儼然受其隅坐兩見

其高也

交友

利瑪竇歐羅巴人也著天主實義人傳誦之而交友論尤切中人情有云古有二人同行一極富一極貧或曰二人爲友至密矣竇法德古之名賢曰旣然何一爲富者一爲貧者哉言友之物皆與共也又云視其人之友如林則知其德之盛視其人之友落落則知其德之薄

死友

張幼于有友姚文學懋言借齋中養疾疾篤其伯氏懋樂欲舁之歸幼于艱然曰生爲吾友死卽非吾友耶竟卒于館舍幼于服總送之嘗閱陳沂蓄德錄載吳文定寬爲脩撰時有同年賀恩寢疾將易篋託于公之旁撫公卽掃室請遷及卒舉殮于中堂使其子服衰以答弔者幼于此舉可謂不愧文定矣

通財

余嘗慨朋友無通財之誼聖門諸賢推顏子原憲爲最顏則簞食瓢飲所居陋巷原則三旬九食捉衿見肘甕牖繩樞貧亦極矣乃同時有子貢廢箸鬻財于曹魯之間最爲饒益且結駟連騎以訪原憲又有公西華乘肥衣輕當時亦不能分給二子稍稍不至乏絕可見通財之義賢者猶難之况末世乎善夫利西秦交友論曰一貧一富號曰相知某人曰旣云相知胡爲一貧一富哉

溫公僕

司馬溫公家一僕三十年止稱君實許魯齋在
中書欲買一僕牙僧以能應對閒禮節者進輒
謝去後得蓬首垢面愚騃者用之或詰其故曰
聰明過我我反爲其所使矣噫此腐儒之見也
蘧伯玉使人於孔子孔子曰使乎使乎未嘗愛
愚騃之人也至司馬公爲其僕呼君實乃公之
盛德若人家畜此奴不大悞事耶後世腐儒遵
此爲訓是主僕皆憤憤者耳閩中福興漳泉人
家僕輩頗跳梁然皆識體至延建邵汀主人肅
客而捧茶僮奴隅坐主人不以爲恠僕愚騃垢
面終身不知着衣戴帽魯齋之言悞之也

狐鼠盜

晝伏夜動者狐也鼠也蚊也盜也四者秉陰氣
人之所惡也士君子昏夜乞哀其狐鼠蚊賊之
類與

壽夭

戶樞不蠹流水不腐是以安逸者常多疾病勞
碌者恒鮮損傷好花易謝不材天年是智巧

者恒致夭折魯鈍者多享遐齡

同干支

先府君與同邑宋某同生正德癸酉年月日時俱同同補諸生同食餼同月生女又同遲嗣續至丁內外艱偶值疾病無弗同者嘉靖戊午宋以病卒無嗣辛酉府君生余伯兄及為邑宰并生余及弟較宋某多三十四年前半世無弗同後則迥異宋號瑤坡忘其名

又

黃叅

吉水羅循莆田吳希由同干支同登弘治己未進士官俱止憲副俱以癸巳卒羅以四月吳以九月但羅子洪先及第第一人而吳子止廣文也吳為四川憲副備兵威茂斬馘無算而羅或以陰德昌後耳

按貢舉考羅循陝西白河人三甲有羅僑乃吉水循當作僑以部本為正三元考云洪先父循亦誤

又

黃增

余鄉有干支同者惠安戴一俊與晉江周良賓同生嘉靖戊子年月日時無弗同者戴以壬子癸丑聯第而周至甲子乙丑乃成進士則遲十

二年也然起家俱戶部俱出守戴溫州周明州俱浙東俱轉憲副俱以守調簡同也戴歸田之後周始登第周卒年六十一戴年逾八十戴有子亮機舉癸卯周有孫廷瑛舉乙卯則同而不同不同而同也又余友陳封君賓與邑人王惟翰別駕同干支王領丁卯鄉薦而陳以是年舉觀察亮采福澤壽考復過之豈自身科名與子孫榮膺亦互相虧盈耶余同年洪方伯啓睿與韓城薛方同生丙辰乙未辛丑丁酉同第萬曆

壬辰同試政吏部然洪舉乙酉薛舉辛卯洪由祠部郎督學兩浙歷參知廉訪左右轄皆在浙薛以臨淮令擢民部調銓部歷稽勲考功文選請告洪亦以其年致政薛後起太常少卿丙辰不祿洪亦以其年卒壽俱六十一同也又星士連堪與余言延平羅某與一同年某同干支同第某科進士同授楚令同行取羅得南刑部某得南刑科情甚昵晨夕過從亾厭會南中大疫羅舉家死亾略盡羅亦染是病幾殆而某獨無

恙每日輒來視羅羅後疾稍可怪某不來詢之
則先一日死矣蓋羅以闔門代死而某及其身
豈非命耶因閱三命通會記樂善錄云太學二
士人同命又同發解約差遣相近彼此知災福
後一選鄂州授一選黃州授黃州者死鄂州者
爲襄事祝曰我與公同干支出處同公先我去
我卽死亦後七日矣若有知幸入我夢以告其
夜果夢其來云我生富貴享受過故死公寒素
未享用故活後鄂州者官至典郡以壽終則儉

約長年奢溢損壽此又一徵也又載家司徒懋
官與申副使价命同司徒死亂兵申死牖下而
申先死朱宮保衡李大參廷龍命同朱第壬辰
李第癸丑遲蚤差二十餘年而官之崇卑命之
修短又無論矣萬侍郎家饒太守才命同然萬
成進士饒止鄉舉萬官卿貳饒止郡守萬以謫
戍死而饒則否饒多子萬又少子豈子孫官爵
互爲乘除造物亦忌于多取耶因并述之以質
知命之君子

飲食

高帝不怠情于頡羹韓信不負諾于漂絮靈轍
赴難以酬恩淵明乞食思冥報誰謂口腹之微
無關心身之重

祈禱

武王疾而周公以身代聖人亦不能以命自安
孔子病而子路以禱請賢者亦不免以神爲佞
是以聖人賢者作之于前愚夫愚婦惑之于後

再拜

玉藻君酒肉之賜弗再拜子思於繆公餽鼎肉
稽首再拜而受孟子亦曰以君命將之再拜稽
首而受子思孟子先與禮舛矣毋怪後世之廢
古禮也

諺

今人諺語皆本于古句法恒相類如掩耳偷鈴
刺舟求劍坐井觀天抱薪救火守株待兔膠柱
調瑟落井下石隔靴搔痒炊沙作飯見兔放鷹
灼艾分痛臨寒索裘又如水中摸月佛面削金

管中窺豹夢中說夢屋下架屋人皆常談鮮有
究其義者

雅事 八則 俳諧附五則

山林公案

友人陳履吉云山中何景最奇曰雨後露前花
朝雪夜何事最奇曰釣同霍守果遣猿收華亭
陳仲醇云三月茶笋初肥梅風未困九月蓴鱸
正美秫酒初香勝客晴窓出古人法書名畫焚
香評賞無過此時二語足爲山林公案

睡訣

陸文量睡訣云半酣酒歎自宿軟枕頭煖蓋足
能息心自瞑目余不甚喜睡嘗有訣云俗事簡
聲色恬不怯冷無苦炎厚襯褥低下簾倦卽臥
自黑甜友人陳履吉云手宋人陳編輒自引寐
此山窓睡訣也過矣過矣

煮茶

友人羅高君曰山堂夜坐汲泉煮茗至水火相
戰儼聽松濤傾瀉入杯雲光瀲灩此時幽趣未

易與俗人言

奕棋

奕雖小技然日長一局是最清境界林君復少
平極清至以着棋與擔糞并稱煞風景矣不如
楊廉夫云棋損閒心盡爲人役語和緩有致

鍤冠

楊廉夫號鍤冠道人所戴鍤冠重四錢六分向
藏高太醫家陳眉公今收得之聞其買鍤冠時
正在除夕前數日公私之逋蝟集猶抽方置此

足稱名士

竹如意筓籜冠

南齊明僧紹隱勞山詔徵不就賜竹根如意筓
籜冠隱者以爲榮

着裘帶帽

華亭孫雪居太守十月便以薪草縛柑桔上陳
眉公曰此爲木奴着裘余小園中喜種菊結苞
時以龍眼殼罩之直至臘後放殼始開陳惟秦
嘗戲余云此爲菊花戴帽可爲的對

種菜

宋宇種菜三十品雨後按行園圃曰天苗此徒助余鼎俎周顛曰春初早韭秋末晚菘王維詩云松下清齋折露葵三君皆得農圃風味此況未可與肉食肥漢道也

客酬主

以下俳諧

有人宴屠緯真酒酸持杯勸曰李白斗酒詩百篇君非青蓮後身耶緯真笑曰令我吸三斗他日可爲宰相其人悟而易酒張幼于赴吳令

招酒酸幼于先以巨觥勸吳令令曰主人未勸客客反勸主人辭再三幼于必勸主人飲一入口知其意卽易酒

睡丞

黃參

張東海睡丞志云嘉興丞某嘗訪一鄉貢坐俟其出輒睡主人出恐覺之相對默坐亦睡丞覺不欲妨主睡坐待又睡主旣覺丞猶睡不欲覺之又睡以待丞覺晚矣主睡方酣遂不交一語而去余友沈從先吳人亦善睡嘗宿予齋頭予

晨起有親故出殯往返七十里暮歸睡猶未覺也黃云余家從兄以塋王父母舉家送殯留一僕守舍與之米使自炊三日歸則反扃其戶呼之不應竊意其鑿垣以遁而四壁宛然因斬關而入猶在吟噀中米仍未炊也蓋睡兩晝夜視沈更酣耳

蹲鴟

顏氏家訓云江南有一權貴讀誤本蜀都賦注解蹲鴟芋也乃爲羊字人饋羊肉答書云損惠蹲鴟舉朝驚駭張九齡知蕭晁不學故相調謔一日送芋書稱蹲鴟蕭答云損芋拜嘉惟蹲鴟未至耳然僕家多怪不願見此惡鳥也九齡以書示客滿座大笑

君臣無鬚

李勣常疾醫云得龍鬚燒灰可療太宗自剪鬚燒灰賜之服訖而愈李勣姊病自爲粥而燎其鬚余嘗戲謂在杭曰貞觀時君臣皆無美鬚在杭詫余無典故余以勣事答之一座絕倒

辨語諧謔

鄭安晚居青田府鹿食民稻犬噬殺之府囑守
黥犬主幕官擬云鹿雖帶牌犬不識字殺某氏
之犬償鄭府之鹿足矣浙右有富人捨竹園于
寺後其子貧甚取其筭僧執爲盜聞于官守判
云當初捨園指望福田旣無福田還他竹園二
事出隨隱漫錄亦足解頤又宋季偶嚴酒禁有
婦首其姑藏私醞聞之官官判云姑誠有罪然
爲婦者宜代受杖遂杖其婦而遣之尤一快也

天象地輿

七則

赤雪

仙家有絳雪晉朝雜事云太康七年雨赤雪二
頃唐五行志貞元二十一年正月雨赤雪于京
師孫甫有論赤雪䟽非祥兆也

甜雪

周穆王時四王母獻曠州甜雪見拾遺記

金馬碧雞

以下地輿

金馬碧雞二山在雲南神在成都漢遣王褒祀

金馬碧雞之神寔在蜀也蜀有碧雞坊薛濤曾居之

廬山

周武王時方輔先生與李老君跨白驢入山煉丹得道仙去惟廬存故名廬山又云周威烈王以安車迓匡續續仙去惟廬存因命其山爲靖廬山邦人以先生姓呼匡山又曰匡阜

山川異聲

平涼有彈箏峽峽口水流風吹滴厓如彈箏之

韻金陵靈谷寺有琵琶街湖口有石鐘山武夷有鼓子峰皆山川之異聲也

武夷木樓

武夷鼓樓岩舊志云石樓四楹非也萬曆癸未五月陳孔震司馬憑陳羽士引至鼓子峰前鐘模石下緣石壁至其所見木造鼓樓一區高廣三四尺瓦甍皆以木窓櫺戶牖皆具制甚精巧釘頭出木外四五分不知何代物傳云飛來或然也司馬至時不難及歸怖甚幾作昌黎華山

之慟程羽士力掖之始得下

呂梁洪石硯

呂梁洪行署之北山韞美石可爲硯嘉靖初張
鐘爲主事分司其地始剖石製硯姚明山涑紀
其事云此石貞潤受墨不讓端歙徐州又有一
種花斑石非此類也

國憲 七則

國朝事勝前代

謝鐸云我 太祖遠過于宋者五事一攘夷狄

以收服諸夏二肇基南服而一統天下三威加
勝國而鋒刃不交四躬自勦業而臨御最久五
申明祖訓而家法最嚴陸文量云本朝政體度
越前代者數事公主寡不再擇壻中官有寵者
賜袍帶不與朝臣并任王公不敢擅殺人重臣
不得自辟下僚文廟不用塑像只用木主岳鎮
海瀆之神不加封號文武官員不得挾妓眉公
曰更有十事生員不許陳民間利弊九鎮鎮府
以文臣爲將天子自爲居守閣臣六卿外廷會

推內廷不得專擅母后不稱制勳戚不干政皇子講官卽宮坊寮案不立博望苑不開天策府無殉葬不用黥刑劓闔之刑京師有熱審省直有減刑非大典不輕赦三品以上始蔭子入監統袴不得濫朝籍余曰最善者不改元官員蒞任不用謝表大夫士庶俱戴網巾不用團扇用摺扇濱海之地不運糧選官惟進士舉貢監吏不別開科目此尤極便于官民前代未有也

國朝御寶

國初舊製十七顆

皇帝奉天之寶卽傳璽也

兩郊大祀及聖節青詞宮中用之司官不與焉

皇帝之寶詔赦用之

皇帝行寶頒賜用之

皇帝信寶徵戎伍用之

天子之寶祀百神用

之天子行寶冊封蠻夷用之

天子信寶調

番卒用之

皇帝尊親之寶薦徽號用之

皇

帝親親之寶展宗盟用之

廣運之寶諭臣工

鈐號籍用之

制誥之寶凡制用之

勅命之

寶凡勅用之

敬天勤民之寶飭覲吏用之

表章經史之寶 欽文之璽嘉靖十八年新製
七顆 奉天承運大明天子寶 大明受命之
寶 巡狩天下之寶 垂訓之寶 命德之寶
討罪安民之寶 勅正萬民之寶 自皇帝之
寶以下十五顆皆司官所得請用 表章經術
以下九顆皆藏乾清宮 萬曆丙申宮燬移貯
文華殿內臣守之司官有時請用用訖仍輸於
內

印文

內外諸司印文俱用疊篆以九畫爲止字用成
雙不及雙者足以之字而總兵所掛印文則用
柳葉篆其玉璽與王府之寶則用玉箸篆其印
形方大小有差一品者三臺二品者二臺俱銀
三品以下者銅惟應天府特賜銀印巡按御史
鐵印柄端有孔條穿之其餘職衙門則形稍長
不方謂之條記

永樂天順正德

南唐賊張遇賢宋方獵俱改元永樂遼述律號

天順皇帝宋西夏賊號正德我朝同此三號儒臣失考之過也甚矣宰相須用讀書人

周太祖十二樂

五代周太祖廣順元年邊蔚議改漢十二成爲十二順之樂祭天神奏昭順之樂祭地祇奏寧順之樂祭宗廟奏肅順之樂登歌奠玉帛奏感順之樂皇帝行幸及臨軒奏治順之樂王公出入送文舞迎武舞奏忠順之樂皇帝食舉奏康順之樂皇帝受朝皇后入宮奏雍順之樂皇太

子軒懸出入奏溫順之樂正至皇帝禮會登歌奏禮順之樂郊廟俎入奏禋順之樂酌獻飲福奏福順之樂祭孔宣父齊太公降神同用禮順之樂三公升降及行同用忠順之樂享籍田同用寧順之樂今五代史無志故樂名闕焉十二樂見郭茂倩樂府足補史氏之缺

金花帖制

唐登進士有金花榜帖用塗金黃紙濶三寸長四寸大書姓名下有兩知舉花押仍用白紙作

大帖貯金花帖外亦書姓名二字蓋以此報其人也見崑山志

茶戶

北苑團茶盛于宋民編徭役名曰茶戶及至我朝久罷其貢而茶戶子孫年費數十金輸官多至破產歷洪武迄萬曆初無有議免其額者泰和郭公子章理建州廉得其狀請于兩臺蠲其稅夫團茶之貢久廢禍及茶戶十數代子孫無名橫征莫此爲甚郭公初仕卽能釐數百年積弊真有寔政在民者不識當時丁蔡輸貢日民之苦又何如也

棟疑

入則

孟子出妻

荀子言孟子惡敗而出其妻韓詩外傳言孟子欲出妻因母言而止二說不同書可盡信哉

高柴爲武城宰

黃參

人知子游爲武城宰不知高柴亦爲武城宰而化行民有不服其親者改之行喪如禮君子之

德風也以身先之而民不遺其親右見陶元亮
士孝傳家語亦云仕爲武城宰按擅弓云成人有其兄死而不
爲衰者聞子羔將爲成宰遂爲
衰恐成未必爲武城或誤也

子平

宋有徐子平精星學術士宗之但稱曰子平子
平名居易五季人與麻衣道者同隱華山今之
推子平者祖宋末徐彥昇實非子平也

積惡公忿

人有積惡公忿莫可誰何者著書人多厚誣之
以快天下之忿如秦始皇爲呂不韋子賈似道
爲遜婢姦生又謂其母遇賈涉挑而從之又謂
賈涉通鬻婢生似道嫡不相容賣爲石匠妻賧
昧之事誰其知之奸暴過甚後世并辱其母是
以君子惡居下流

大姨夫

邵氏聞見錄云歐陽文忠與王拱辰同爲薛簡
肅婿文忠先娶長拱辰娶其次後文忠再娶其
妹故有舊女婿爲新女婿大姨夫作小姨夫之

戲余按歐公文集公初娶胥氏年十七卒繼娶楊氏年十八卒三娶薛藺肅第四女偕老焉而王拱辰所娶者第三女也拱辰喪室又娶薛氏第五女則王爲大姨夫非歐公也

太祖御像

長洲王錡寓圃雜記云吳故墟之西有天王堂其南廊土地像爲劉總管所塑甚精絕永樂初襄陽閻儁爲蘇州衛百戶偶覩此像卽伏地泣人問其故答曰我高皇帝之容也蓋儁

侍

帝左右五年諦視甚熟故感泣耳自

是遍傳吳中余以萬曆壬辰秋客吳友人錢允治與余遊吳故墟入一寺寺前有土地端坐錢曰此我高皇帝像也余駭詢其故錢以前言對其塑像方面大耳隆隼豐額與今時所傳畫像大異近閱張民部萱疑耀云萱直西省始見內府所藏高成二祖御容

高皇乃美丈夫也鬚髯皆如銀絲可數不甚修無所謂龍形虬髯十二黑子也

成祖豹

額環眼兩髭橫分鬚長裹臍皆翼善冠衣綠不
正立然則

高皇之像蘇州天王堂土地

所傳非謬矣吳黃暉蓬軒類記亦載天王堂事
玉璽圖說

天啓四年九月四日磁州東八里臨漳縣務本
村漳河北岸有田夫邢姓者正畊野間瞥見異
風數陣河岍攤塌聲震林木隨滾出黃白色物
如斗大光芒陸離精彩奪目三尺許乃除去浮
土得玉璽不敢自秘因呈本道按而驗之重一

百二十兩方各四寸面厚一寸二分螭龍鈕高

一寸八分篆文曰受命于天既壽永昌於都懿

哉余觀此寶埋光掩彩不知閱幾千年 聖明

在御遂獻禎符是天終不愛道地終不愛寶也

所謂既壽永昌且爲我 皇上發之矧夫黃河

澄清鳳皇來儀諸瑞畢至迺爾未有禎祥迭見

如今日之盛者億萬斯年惟願 皇上相傳若

此敢不靖共厥位以輔受命于無疆哉分巡河

北道副使齊東張夢鯨撰按南村輟畊錄云至

元三十一年甲午春正月太師國王之孫曰拾
得者嘗官通政院事既歿家計窘極其妻脫脫
真榮病一子九歲以玉質供朝夕及出玉印也
取視色混青綠而玄光彩射人其方可尺四寸
厚方之三背鈕盤螭四厭方際紐盡璽壘之上
取中通一橫窾可徑二分舊貫以韋條面有象
文八皆若垂鳥魚龍之狀其文曰受命于天既
壽永昌此傳國璽文也秦以和氏璧所造厥後
有天下者寶之以君萬國御史楊桓率百官進

獻皇太后御前傳旨賜收玉之家楮幣三千五
百貫御史中丞崔彧進傳國牋歷攷累朝傳授
亡失之由見輟耕錄但篆文係鳥跡非若天啟
四年臨漳所拾者也崔彧牋曰徽宗爲金所虜
凡有寶璽金皆取之內璽十有四青玉傳國璽
一與至元所獻同則知南渡二百年無傳國璽
也明矣天啟四年所獻璽與至元所獻大小不
侔篆文亦異豈徽宗十四璽中之一乎記之以
俟博古者

石鐘

湖口石鐘山水經注以爲水石相搏若洪鐘唐李渤以爲潭上有雙石聲清越若鐘蘇東坡親履水濱聽風濤鏗嗒遂非李說千百年幾成聚訟東坡好竒者也又酈道元載之水經可據若李說山石之響宇內何處無之烏足以名是山哉

博聞 八則

瓦棺

人死藏魄于木古禮也金陵瓦棺僧事甚異陸放翁筆記云靖康丙午臨邛夾門鎮山險處得瓦棺長七尺厚二寸與木棺同骨猶不壞然則昔之以瓦爲棺不獨一僧也

金蓮炬

金蓮炬送歸院始于令狐絢宋王珪蘇軾晁迥史浩亦被此寵今人但知蘇軾

鍊硯

古人用鍊硯者桑維翰也洪厓先生欲歸河內

舍人劉守璋贈以揚雄鍊硯以鍊爲硯始自揚雄維翰効之耳

琵琶故事 黃參

琵琶故事烏孫公主王昭君潯陽商婦最著皆婦人也男子無聞黃云善才非男子乎

放龜

毛寶放龜事寔其軍人見寶本傳諸書誤以爲寶相沿不察寶守鄴城石虎遣將攻城寶突圍出溺死江中

戮鱷

人但知韓文公能驅鱷魚遠徙而不知宋陳文惠堯佐詔縣吏操網捕鱷戮而烹之唐有鱷旣徙至宋猶出食人文惠一戮之後不聞鱷再爲患然則文惠之功在昌黎上矣文惠有自撰戮鱷文

放雀

徐州雲龍山有山人張天驥放雀亭山人有二雀甚馴旦則望西山而放莫則望東山而歸蘇

子瞻爲作記今人但知林和靖孤山放雀亭而天驥之名不著特表出之

捕蟬

今之穉子捕蟬每用桃膠塗竹竿稍上粘之卽得曹子建云怪柔竿之冉冉兮運微粘而我纏欲翻飛而逾滯今知性命之長捐蓋自古已然矣

占驗 三則

朱子前定數

義烏東平山有宋平昌刺史劉豪墓隆慶戊辰長至裔孫尚恭重脩墓碑掘數尺見墳臺臺上有磚方尺許刻晦菴卜墓數云天聖戊辰墓此丘陰十八紀出公侯子子孫孫垂不替繩繩武武永無休五百四十一年損十七八歲裔孫脩戊辰戊辰新一石重脩重脩千百秋秘書郎朱熹書按天聖戊辰至隆慶戊辰年數良是而長至又恰戊辰仍孫劉仕龍在宋贈武節侯脩墓裔果年十七歲文公之數亦奇矣劉之曾孫輝

煇皆文公門人故爲之卜而刻之墓

吳司空夢

新建吳司空桂芳未第時至鯉湖禱夢仙書云
蘭陵美酒賞心樂事功蓋天下澤及萬民公密
記之人問夢只以前兩句對及登第出守揚州
蒞任之日見酒肆中懸一招牌則前兩句憬然
有悟但後兩句未驗耳後公累官漕運總督經
畧淮海晉工部尚書以勞瘁卒贈太子少保制
云功蓋天下澤及萬民乃歿後始驗也

水去就好

華亭曹別駕潘爲諸生日禱于鯉湖夢一童子
云君榜上已有名但水去就好甲午試北畿從
闈河入京竟不第迨丁酉歲焦弱侯爲考官錄
其文魁禮經寫榜人誤書潘字作蕃所謂水去
之應也別駕與余言

醫學四則

楮氏平脈

南齊楮澄精于醫著書十篇刻石殉葬後盜發

其塚書傳人間第三篇平脈言女子肺脾命在左心肝腎在右與今人診脈殊異錄之備攷

學醫五難

祝允明云病家貴驕不肯敬從一也病人愚悞強謂自知不能服從二也愚下之輩不辨良庸時有劣工謬得俗譽愚下必棄上匠而委劣工三也劣繆之徒信其妄施偶中他力自執爲是四也良雖薦藥服者他參用而復疑愈不專工敗乃分謗五也

喉閉藥

喉閉之疾用鴨嘴磬調醞醋灌之卽吐膠痰見癸辛雜志

稀痘方

王損菴筆塵云姑蘇有一僧賣稀痘藥服之神驗王荆石相公許以重利欲傳其方峻拒之後以十金得之於其徒乃玄參兔絲子二味等分蜜調服也公欲廣其澤見人卽說後罕驗蓋秘方廣傳則不効人莫喻其理王先生曰衆生業

力大製方者心力幾何不能轉之故也予謂古
方療病今人多不驗痘瘡五年一發或時年宜
用涼用溫未可執一而治予幼年見閩中治痘
什九用參耆近年用補者死多用涼劑此可以
破其說矣

靈異

十一則

附果報四則

阿育王塔

四明鄞山阿育王塔晉太康三年從地湧出其
狀青色似石非石高一尺四寸方廣七寸露盤

五層四角挺然中懸金色小鐘舍利綴于鐘下
圓轉不定繞塔四周俱是鏤空諸佛菩薩金剛
聖僧八部等像神工聖迹非人力所及萬曆丙
子平湖陸五臺公瞻禮初見舍利大如芡實已
如彈丸已大如瓜最後大如車輪五色變幻光
彩射目壬子泰和郭孔泰孔陵到山瞻禮舍利
初視若黍珠已如豆如蓮子同觀者或見如新
菱出殼兩角垂絲絲綴以珠或見如葡萄色或
見如桃瓣或見如金蓮花瑞相種種莫可殫述

始知佛大神通歷千百年不滅也

金雞

武夷接筍道士程應玄者曾入金雞下洞從舟中仰視洞若不甚深廣所堆木若有限比履其所甚宏邃內有三丈餘楠木上閣仙琬十三函每函頭顱一二片脛骨一二莖手骨一二節皆裹以錦帕一函中有霍骨頭與足各一又有楠木剝一舟長丈餘濶三尺內細羅香末并香灰幾滿而洞中香灰成堆者亦壘壘然上金雞洞

視下洞爲小人不敢到萬曆丁丑五月有張富郎者年八十餘冒險入其中則見數人鼾睡香灰內傍有銅磬覆地富郎翻而視之磬下一雞遽展翼鼓扇香灰眯目倉皇俯伏半晌稍息亟由籃縋下半空籃掀富郎墜入舟子懷中無恙後年九十終應玄親見富郎道其詳陳司馬又親見應玄紀其實

金雞洞香爐

武夷金雞洞舊志云嘉靖甲午飛來鍤香爐可

三百斤戊戌御史李元陽作記謂洞中見新置一物如香奩狀丹朱燁燁約方六七尺侍御先一日望洞中無有次日乃有見洞在二十仞之上下臨不測何一宿之頃能致之速耶據此二說則洞中飛來者先爲香爐後飛者不知何物也邇年陳司馬孔震記云只見洞傍小石岩中有一爐若盤盂而不見所謂六七尺及三百斤者豈變幻無常耶

石鏡

高州府城有洗夫人廟祀梁太守馮寶妻廟前古碑一通厚可尺餘有石鏡一點白色形類碁子通明瑩徹視之可見後殿屋宇器物余幼游高涼及壯所見異物僅此耳

蛇精蟒精

范鎮東齋記事云蔡君謨知福州疾不視事者累日夜夢登鼓樓憑鼓而睡通判有怪鼓角將累日不打三更者因對數夜有大蛇盤據鼓上君謨既愈與通判言所夢正與鼓角將所說同

遂以君謨爲蛇精米襄陽志林云米知無爲軍
嘗呼譙門鼓吏日夜來三更不聞鼓聲吏言有
巨白蛇纏繞其鼓故不敢近米頷之叱吏去不
復問故郡人疑其蟒精

朱晦庵魏霍山

宋咸淳間蜀人彭澹軒罷江東倅遊武夷山嘗
獨行林藪入草菴中見二士夫峩冠博帶對食
招彭坐俎中豕首一羊肺一雞一所言皆先天
圖易傳性理之學玄妙深奧不可曉彭問其姓

字右坐者曰姓魏山林野叟無字可稱問左坐
者不答日暮辭出彭明日携僕挈榼再往無徑
可達下山至一富家言所以富家曰異哉昨日
至朱祠致祭正俎中之肴方悟左者朱晦翁右
者魏霍山也此段載異聞總錄可備武夷山志
之缺

人異

成化間漳平縣有朱孔良家婦懷孕三年乃生
子子生卽轉身行步三日升樓而去彌月復來

又去週歲復來自斷髮爲一結取小匣盛之與
母別日數十年髮解則吾復生遂去不復來矣
正德間母猶存發視之結如故絕無影響邑志
載此事亦大異也

鰲異

錢塘張尚書曾孫某典簿堯恩之子也有塘栖
呂氏餽張活鰲張付烹魚俄聞釜中有慨嘆聲
張異之取視而鰲斃矣剖其腹中有人長二寸
眉目口鼻肢體手足無一不具跣趺坐蓮花上
金中丞公子魯親見之爲余言時萬曆戊申年
也

龜異

孫太初居南屏山時養一龜後去道場山遺龜
于南屏僧寺孫化十數年僧明鏡夢青衣人求
救曰某孫太初伴也願師明晨索我于花臺之
下僧寤往發得一龜徑尺爲石所壓其筒半裂
而蛆叢集僧欲瘞之越夕不知所往然歲歲聞
其聲至今不絕

魚異

仁和張問渠者冢宰元洲之兄也母陳畜朱魚二十餘頭玩弄日久母歿問渠哀毀不忍往視皆變爲白群客聚觀咸謂魚常變色無異也比及去喪之日魚復變赤儼同除喪人謂孝感所致

金字牌

萬曆己酉五月十四日揚子江心風浪大作有渡船載百餘人幾覆忽見浪中有鬼面者持一

牌起書金字一字衆謂必有金姓者在舟當死果有姓金者一人衆欲推之入水金本持齋誦經乃曰若活衆命吾何惜死然數止此安能倖免乃躍入水中時風狂舟速金彷彿若有人扶之者巨浪送上郭璞墓墩而立見舟翻覆俱溺死獨金得生江右劉觀察親見其事

龜蟒

以下果報

趙昭儀旣死趙后夢中見帝問昭儀何在帝曰以數殺吾子今罰爲巨龜居北海之陰水穴間

受千歲水寒之苦後北鄙大月王獵于海上見
巨龜出于波上首猶貫玉釵有戀人之意大月
王遣使問梁武帝武帝以昭儀之事答之武帝
后郝氏崩數月帝常追悼之一夕聞寢殿外騷
宰聲視之乃見一蟒盤躡上殿睽睛張口向帝
帝大驚蛇爲人語曰蟒則妾郝氏也以生存嫉
妒六宮其性慘毒罪謫心蟒耳無飲食可實口
無穴窟可庇身又鱗甲有虫咬齧肌肉痛苦若
加錐刀焉感帝平昔眷妾之厚故託醜形祈一
功德拯拔也以妃嬪之尊一旦嫉妒則罰爲惡
爲蟒今之殘忍妒婦亦將來之龜蟒耳二事須
頒行以警長舌

犬異

錢唐江氏過淨慈寺歸夢其亾婿卜四爲寺之
堆雲菴犬自言生前爲嘉定徐氏子因負寺債
遂墮狗胎于茲三年願文人爲懺除之明發江
氏至寺見犬大慟呼曰卜四官何以至是犬淚
下搖尾隨江氏去萬曆壬寅年事僧大壑爲余

言

毀佛

魏莊渠毀佛槌碎六祖遺鉢折寺院無數後嗣
乏絕聶雙江毀寺亦無嗣誰云佛無報應哉

雷震毀寺

蜀成都府彭縣有寂光寺廣袤五六里香火甚
盛其地有縉紳劉志淵者垂涎梵宇可拓私居
斥逐僧流毀除佛像方埋佛入地忽霹靂一聲
震志淵立斃身首異處後有邊司徒之子一范

破產恢復再建叢林劉氏子復爭之事在萬曆
庚子辛丑間時傳金沙張芝陽俱為蜀憲倡義
重興焉

珍玩

七則

火玉

唐武宗時夫餘國貢火玉光照數十步積之可
以然鼎寘室內不必挾纊古所無也

窰變

饒州府學神庫中有窰變香爐一花瓶二相傳

舊爲回青所畫變成赤色今花紋或淡或濃宛然錦繡上署永樂四年造但神爐非玩器也

宋硯

三十年前吾鄉宋硯最多人不知重故家收藏與凡硯等余目擊宋硯不下百數二十年間轉鬻吳越殆盡蓋鄉人利其厚值故也余友林熙工家藏一硯石質完好背刻嘉佑御賜鄭穆六字林得于鄭之子孫真世寶也穆字閔中侯官人居館閣三十年官至祭酒閩先達也此硯款

識宛然當爲吾鄉第一

流黃劍

上元夫人佩流黃劍會王母於漢武宮中

軟倭刀

嘉靖中胡總制宗憲有軟倭刀長七尺出鞘地上卷之詰曲如盤蛇舒之則勁自若唐天寶時有軟玉鞭光可鑑物屈之則如環伸之則如繩亦異國所獻鍊玉最堅剛之物能屈伸之理之不可曉者

鵲尾爐

費崇先信佛法以鵲尾香爐置膝前陶貞白有金鵲尾香爐

料絲燈

料絲出滇金齒者勝詢之士人云以瑪瑙紫石英諸藥品搗為屑煮腐如粉然必市北方天花菜點之方凝即縑為絲織如絹狀上繪山水人物諸色極晶熒可愛以煮料為絲故名料絲

花卉果木 十三則

桃花故事

謝在杭文海披沙徵芙蓉事極多謂他不能稱是予以桃花為名亦甚夥因列于後

桃花源 武陵 桃花渡 四明地名 桃花雨 天寶中雨如桃花明年有

馬嵬 之變 桃花水 三月之水 桃花浪 杜詩三月桃花浪 桃花醋

唐世風俗貴葫蘆油 桃花醋 桃花蜆 海錯 桃花蹊 桃花紙

楊炎在中書糊窓用 桃花馬 馬名 桃花種 閩穀名

桃花石 在定海桃州山昔安期生以醉墨洒石成桃花 桃花扇

桃花帳 桃花縹 二千石後名 桃花信 主母藥 桃

花米 宋武帝張妃事 桃花癩 桃花妝 貴妃事開 桃

花酒 酒漬桃花益人顏色見太清卉木方 桃花犬 宋太宗淳化中綿州貢

桃花灘 在貴溪縣 桃花觀 玄都觀在朗州 桃花面 人面桃花相映

紅崔護詩 桃花賦 皮日休 桃花岩 在邵武 桃花洞 在杭州

桃花精 博異記紅衣人送酒事 桃花嶺 談圃石曼卿判海州泥裡桃核

拋嶺上二三 桃花舖 安慶太湖縣 桃花臉 桃花

腮 桃花塢 杭州臯亭山鍾山獨龍岡 桃花簋 咸池 桃花

犬 山西廉使趙澤民家獵犬見秘笈 桃花偈 志勤禪師 桃花汗 貴妃

桃花井 師曠聞天老曰井上種桃花落井中不祥 桃花廳 在許州梅聖俞

有桃花絲 青齊間桃花垂絲二三尺練以桃

花骨 守宮塗臂而骨紅名桃花骨 桃花行 李嶠作桃花詩帝采入樂府因

名 桃花寺 見宋趙師秀詩 桃花夫人 卽鬼夫人見杜牧詩 桃花

茶 東坡詩問大治長老乞桃花茶

凌霄金錢

凌霄花金錢花皆有毒不宜近眼花露入眼則

失明

刺桐

嶺南異物志曰刺桐南海至福州皆有之叢生

繁茂唐陳去疾家于閩郡因言方物云刺桐葉
綠花紅今泉州名刺桐城問之泉人亦云不識
此樹何狀福州蓋未之見矣

枸杞

枸杞續仙傳朱孺子見二犬入杞叢下異之乃
尋掘得二杞根形如犬故名狗杞杜子美以狗
杞對雞栖白樂天詩云不知靈藥根成狗怪得
時聞夜吠聲後世方書皆曰枸杞誤也

大茶

天台記丹丘出大茶服之生羽翼又蒙山頂茶
一服祛疾二服無病三服換骨四服卽爲地仙
故盧仝歌云旣覺兩腋習習清風生蓬萊山在
何處玉川子乘此欲歸去皆有所據非漫語也

異草

善語國有草食之令人不眠名却睡草

洞冥記興

慶池南有草紫葉而香醉者嗅之卽醒名醒醉

草

開元遺事

常山有草置諸門夜有人過輒叱之名

護門草

西陽

東海祖州有草人死三日覆之卽活

一株可活一人名不死草

十洲記

瓊州有草視其

節知一歲風候名知風草

一統志

黃帝時有草生

于庭佞人入則指之名指佞草

御覽

漢武帝時異

國獻草似蒲帝思李夫人懷此草輒夢見之名

懷夢草

酉陽

禹餘糧

張華博物志曰扶海川上有草名蒟其實食之

如大麥七月熟民歛之至冬乃訖名自然穀或

曰禹餘糧唐詩云澗有堯時韭山餘禹日糧

嘉客紅

宋福清翁昭文先儒亢從子也圃中非時生荔

支其母曰豈有嘉客踵門耶頃之莆田林光朝

至因名為嘉客紅可補荔譜之缺

龍荔

交南有一種龍荔實如小荔枝味如龍眼木與

葉亦類閩廣陳剛中詩云龍荔綴如珠

三寸柑

凡柑皆圓獨成都產者形如鴨卵故杜甫詩云

三寸黃柑猶自青三寸言其長也余嘗過臨江
府地產黃柑有長三寸者

嘉慶子

唐韋述兩京記東都嘉慶坊有李樹極美故稱
嘉慶李千百年後稱李乾皆曰嘉慶子他物未
有如此之得名悠久也

丹青樹

西京雜記云終南山有合離樹紅綠相雜班駁
如錦繡長安謂之丹青樹

蚊樹

嶺南異物志曰有樹如冬青實生枝間如枇杷
每熟卽圻裂蚊子群飛惟皮殼而已
蚊于樹
今永福山中有之鄉人爲余言

鳥獸蟲魚

六則

梟非不祥

梟惡鳥也人聞其鳴輒爲不祥昔謝艾梟鳴牙
旗乃兆軍勝張率更梟鳴庭樹乃兆授官唐章
顓將放榜日梟鳴簷際逐之復還顓曰我失意

無所恨兼恐橫罹災患須臾榜出顯登第然則
最非惡鳥也

念佛鳥

九華山產念佛鳥形大如鳩色黃褐翠碧間而
成文音韻清滑如誦佛聲唐韋蟾詩云靜聽林
飛念佛鳥細看壁畫馱經馬

龍九子

龍生九子所載不同一曰蒲牢好鳴鐘鈕之獸
囚牛好音樂器之獸蚩珠好吞殿脊之獸嘲風

好險殿角之獸睚眦好殺刀頭之獸負屭好交
碑旁之獸狴犴好訟獄門之獸狻猊好坐佛座
之獸霸下好重碑座之獸又云羆貓好險簷前
獸饕餮好水橋下獸螭蚺蚺好慵門前獸憲章好
囚獄門獸蜥蜴好腥刀頭獸蒲牢霸下負屭啣
吻與前同

貓睡

貓之善捕鼠者日常睡終日跳擲者必不捕鼠
見陳止齋集貓不捕鼠者名麒麟貓有味

鮫魚皮

吾閩產銅鍔鑄刀劍甲天下劍鞘以鮫魚皮爲之堅硬如石海中有魚名鮫魚或以爲鯊魚皮非也李長吉劍子歌云鮫鮐皮老蒺藜刺鷓鴣淬花白鷓尾正指此也魚皮隱起細刺如蒺藜故云

鱉車螯蠟

閩中產鱉見韓退之詩車螯見歐陽永叔詩蠟見蘇子瞻詩

